



Inatsisartunut ilaasortaq Kristian Jeremiassen, Siumut  
Maani

## **Apeqqummut Naternami umimmaat pillugit, nr. 269-mut akissut.**

3. januar 2011  
Sagsnr. 2010-043521  
Dok. Nr. 535863

Inatsisartut suleriaasaanni § 37, imm. 1 malillugu Naternami umimmaat pillugit apeqquteqaateqarsimavutit. Apeqquteqaat uanga Naalakkersuisoqarfinni akisassanngortinneqarsimavoq.

Postboks 269  
3900 Nuuk  
Tlf. (+299) 34 50 00  
Fax (+299) 32 47 04  
E-mail: apnn@nanoq.gl  
www.nanoq.gl

### **1. Aasaq manna naternami naternallu eqqaani umimattassat tamakkerlugit pisarineqanngitsut ukiuunerani piniarneqarsinnaasunngorlugit Naalakkersuisut periarfissiiniarpat?**

Ullumikkut umimmaqatigiit ilaat ukiuunerani piniarneqarsinnaapput, tamatumunngalu peqqutaavoq, umimmaqatigiit pineqartut inuilaami tikikkuminaatsunilu immata imaluunniit umimmaqatigiit ikilisaaffiginissaat kissaatigineqarmat. Naternaq tamakkerlugu umimmaat piniarneqarsinnaapput a) inuussutissarsiuutigalugu sunngiffimmilu piniartunit 1. august-imiit 15. november ilanngullugu, b) tammajuitsussarsiniarluni piniartunit 1. juli-imiit 15. november ilanngullugu kiisalu c) ukiuunerani tammajuitsussarsiniarluni piniartunit 11. marts-imiit 11. april 2011 ilanngullugu.

21.12.2010 Pinngortitaleriffiup Naternami umimmaqatigiinnut tunngatillugu akuersissutit 10-it atornikut 6-illu atorineqanngitsut akuersissutinit 120-usunit tigumavai. Ukiumi piniarfiusumit nalunaarutit suli tamarmik tiguneqarsimanngimmata, Naalakkersuisut suli oqaatigisinnaanngikkallarpat pisassiissutaasunit qassit sinnerunnersut.

Naalakkersuisut ukiumi piniarfiusumi maani ukiukkut piniarnermik ammaassinissaminut pilersaaruteqanngikkallarput, ukiumulli piniarfiusumut 2011-2012-mut pisassiissutinik piniarfiusunillu aalajangersaanermi pisarnertut ilaatigut, pisanik nalunaarutit sumiiffinnilu soqutigisalinnut tusarniaanerit naatsorsuutitut ilanngukkumaarlugit. Piniarfiusulli killilersimaarneqarnissaa anguniarneqartarpoq, uumasut annerpaamik eqqissisimatinneqarnissaat tamatumuunalu kinguaassiorsinnaatitaanissaat angujumallugu. Ukiukkut piniarnerup allisarneqarnissaanik biologinit siunnersuisoqariarpat Naalakkersuisut isummerfigiumaarpat.

### **2. Umimmannik kisitsisoqarnissaa pilersaarutigineqalernikuua?**

Naternami umimmaat kingullermik 2008-mi kisinneqarput. Pinngortitaleriffik nalunaarpoq 2011-mi umimmaqarfimmik taassumanga kisitsinissamik pilersaaruteqaratik.

### **3. Aappaagumut umimmattassiinissami pisassat ikilineqarniarpat?**

2010-mi 2011-milu pisassiissutit allanngussanngillat, soorlu tamannarpiaq 2010-mi upernaakkut nalunaarutigineqartoq. 2008-mi umimmannik kisitsinerup kingunerisaanik pisassiissutit 15-nik ilaneqarput, pisassarititat 64-nngorlutik. Tusarniutigineqartut pisanilu nalunaarutit aallaavigalugit 2010-mi pisassiissutit 120-nut inissinneqarput. 2011-mi 2012-milu piniarfusoq pillugu suleriaaseq tamanna atorneqaqqissaaq, pisassiissutillu qaffanneqassanersut, appartinneqassanersut taamaaginnassanersulluunniit aalajangiiffigineqarumaarlutik.

Inussiarnersumik inuulluaqqusillunga

Ane Hansen